

# Suão Sesus tuktsa bo ziwatahaka

Tubabatu kytsa watahaha — Suão ziwatahaka — mynakaranaha. Suão Sesus tuk zinymyrykya. — Tynaharape pokzitsikinaha — ana hi ziwatahaka. Aba katsa kino niwatihi tanymyryky.

---

## Sesus Kiristu Deus harere baba.

**1** <sup>1</sup> Abaka katsaktsa ikiahatsa bo tahawatahakanaha. Sesus Kiristu ahabo tawatawy tsihikik iwatsahi tawatahaka. Deus isuknihi byituze Sesus Kiristu koikny baktatu my. Atakta Deus harere babata tu hÿ. Iharere humo tsikspirikpokonaha zeka meky watu tsimoziknaha. Tsimyhyrikosokdanahaze ituk mywahi tsimynapykyryknaha Sesus Kiristu inasikze iharere tsiwabynaha hÿ. Tsinynaha. Ituk zikzurukunaha. Abaka ibo mytsatyziu tsimykaranaha.

<sup>2</sup> Atakta mybarawy bo inasikze mywata niyzik. Iwatsahi katsaktsa tsinynaha. Ata soho hi tsimytsasokonaha. Asahi ihumo mospirikponahaze meky watu moziknaha. Tsimyhyrikosokdanahaze Deus tuk mywahi tsimynapykyryknaha. Atakta Deus tuk tawahi mynapykyryk. Tubabatu Deus tuk koikny baktatu mybo tawatawy.

<sup>3</sup> Nawa ha ty botu tsinynaha ahabo tsimytsasokonaha. Botu tsiwabynaha hi ahabo tsimytsasokonaha. Tsimytsasokonahaze isoho humo ahahyrinymyrÿtsa. Ikiahatsa mywatsa Deus myzo hyrytsa tsimoziknaha. Katsaktsa Sesus Kiristu tukytsa tsimaha ikiahatsa kino niwatihi mytuk itukytsa tsimoziknaha. Iwatsahi ahabo tsimytsasokonaha ikiahatsa kino niwatihi mytukytsa tsimoziknaha. Katsaktsa myzubarÿtsa astsatu tsimoziknaha hÿ.

<sup>4</sup> Anahi tawatahaka iwatsahi ahakurÿtsa tsimoziknaha. Ikiahatsa Sesus humo ahaspirikporÿtsa. Katsaktsa mykurÿtsa tsimykaranaha

## Deus haramwe eksok hyrity wa.

<sup>5</sup> Wabyziutaha! Deus wasania ty ahabo tsimytsasokonaha. Deus haramwe eksok hyrity wa. Atazuba imysapyrÿnikita. Ihumo mypubara

zuba. Katsa mysopyksapybyitsa tu tsimykaranaha zeka batu ituk zikapkyknaha. Amy ty batu mysapy kytsa papatu tsimykaranahaze mysikybyrētsa tsimoziknaha. Katsa wasani tsimaha zeka haramwe eksok hyrity wa iwaze Deus tuk tsimypykyryknaha. Anahi Sesus mybo nitsaso katsa iharere tsiwabynaha. <sup>6</sup>Katsakta:

— O Deus atukytsa tsimaha — mytsaty ahabyitsa tsimykaranaha. Hawaha tsimytsasokonaha zeka mysapybyitsa tu tsimykaranaha mybarapetu tsimykaranaha. Katsa wasanibara ty tsimyzurukunaha. Iwaze batu Deus tuktsa tsimoziknaha. <sup>7</sup>Deus ta batu zimyi batu ziky. Atazuba haramwe eksok hyrity wa. Wasanikita. Katsa iwata tsimyzurukunaha zeka tyharape hapokzitsikinaha, Deus mysopyksapybyitsa tu tsikykaranaha mymyokzohik. Sesus Deus tse iharapatawyhyta humo taspu ziwebaik nihyrikosokda ana humo hi mysapybyitsa tsikykaranaze Deus mymyokzohik. Abaka Sesus humo meky watu tsimoziknaha. Ihumo mysapyrētsa tsimoziknaha hỹ.

<sup>8</sup>Katsa tihĩ zeka:

— Katsakta isapyrēnikia ty zuba tsimykaranaha zeka. Deus harere bo zuba hỹ tsimynakaranaha — mybarapetu tsimykaranaha. Batu ma zikaha. Iwa tsimykaranaha zeka mybarapetu tsimykaranaha. Anaharere humo hi baija tsimykaranaha. <sup>9</sup>Mysopyksapybyitsa tsimykaranaha zeka Deus bo tytsasonaha. Iwa mysapybyitsa ty ibo tsimytsasokonaha zeka iwahatu mymyokzohik. Iwa botu nitsaso iwatahi mysapybyitsa tsimykaranaha iharere humo mymyokzohik. Iharere wasani my. Ihumo meky watu tsimoziknaha. Ihumo mysapyrētsa tsimoziknaha hỹ. <sup>10</sup>Deus hi:

— Mybarawy ezeiksa simysapybyitsa mykaranaha — niy.

Tsimytsasokonaha zeka:

— O katsakta batu. Wasani tsimaha — mybarapetu tsimykaranaha. Iwa mybarapetu tsimykaranaha zeka Deus harere humo batu ahahyrinymyry tsiwatawykynaha. Deus botu nitsaso mybarawy ezeiksa isapybyitsa mykaranaha, katsakta ipe tsimaha zeka:

— O batu wasani tsimy — iwatahi Deus mospihikbatakata wata mybarapetu tsimykaranaha.

### Kiristu mymytsumuēhiekik.

**2** <sup>1</sup>O myzubaha kahyrytsa watsa ikiahatsa bo piwatahaka iwahatu hawa batu sapybara humo ka batu ahakparawy. Iwaze imysapybara ty ka moewyhiktaha. Ikiahatsa ahamysapybara ty tsimaha zeka Sesus Kiristu ahatsyhyryze Deus bo mopamykyso. Atahi pahabetesaka Deus myzo babata bo mopamykysoko. Sesus imysapyrēnikita my. <sup>2</sup>Ata kino mysapyzeken nihyrikosokda. Nihyrikosokdaze mysapyzeken niyzik. Iwatahi Deus mymyokzohik. Mybarawy ezeiksa sizubarētsa imysapybara ty nikaranaha mysiokzo tsihikik hỹ.

<sup>3</sup>Deus harere bo hyĩ tsimykarannahaze itukytsa tsimoziknaha. Iharere bo hyĩ tsimykarannaha ana humo hi itukytsa tsimoziknaha. Anahi tsinymyrykynaha. <sup>4</sup>Aty iharere bo hyĩ byizeka katsa mype:

— Utakta Deus humo kahyrinymyrêta — mybarapetu nikara. Deus harere wasape nikara iharere wasani zuba ana humo kino batu ma ziky.

<sup>5</sup>Kytsa Deus harere bo hyĩ maha zeka Sesus humo sispirikporêtsa moziknaha. Asa kino Deus humo simypokzitsiukrêtsa anatyhi kytsa bo piwatawynaha. Deus harere bo hyĩ mykarannaha zeka hawa haty Deus mozihihikik yhy mykarannaha iwa Deus sopyk tanymyry. <sup>6</sup>Katsaktsa Deus pe tsimaha:

— O Deus hawa tsimyzihikik ana bo hyĩ — tsimaha. Iwaze hawa Sesus zikzuruku katsa kino niwatihi isopyk watu tsimykarannaha. Sesus watsa tsimyzurukunaha zeka iwaze hawa Deus mozihihikik yhy tsimykarannaha. Hawa mozihihikik ana humo hi myhyrinymyrêtsa hy.

#### Abaky mypehawy.

<sup>7</sup>Kaharereziuwyttsa botu ahabo iktsasoko atsatu ahabo piwatahaka, kaharere ezytyk. Tubabatu myzotsa niakbakanahatsa botu nitsasonaha hawa ahasopyk. Aba kino atsatu piwatahaka, kaharere ezytyk waha my.

<sup>8</sup>Ana soho hi ahabo piwatahaka. Hawa Sesus zikzuruku ikiahatsa kino niwatihi kytsa sopyk anahi tsynynahaze ana kino ezytyk waha my. Hawa Kiristu zikzuruku naha bo mytsaty tsimykarannahaze ana humo kino myhyrinymyrêtsa. Sesus anaharere bo yhy ziknakara, iwatahi myzubaha bo nasisapywyky. Katsa kino niwathihiktsa! Sesus haramwe eksok wa. Aty iharere bo hyĩ mykaraze maku iwororo waha eze pitabaka tawata Sesus tuk kytsa mysipokzitsiki.

<sup>9</sup>Atahi:

— O uta Deus harere bo hyĩ mykara. Katsy batu kakparawy ihumo kakyrirêta — iwa mybarapetu mykara. Ata kino tatsy humo takyrikize zimyikik iwatahi Deus harere bo batu ma ziky. Maku miwa ha buruk pitabakaze tawata, tatsy tsiakyriurêta humo. <sup>10</sup>Aty tatsy humo impokzitsiki Deus harere bo hyĩ mykara. Batu zimyí. Ata kino maku iwororo waha eze pitabaka tawata, tatsy pipokzitsiki humo.

<sup>11</sup>Atahi tatsy humo takyriki iwaze Deus harere bo batu hy ziky. Zimyiki. Ata kino maku wata miwa ha buruk pitabaka. Iktsabyitatu miwa humo izarata tawata. Atakta tatsy humo takyriki miwa ha buruk ta wata. Tsiakyriurêta tuze Deus harere bo batu hy ziky izarata wata paikpa nikara.

<sup>12</sup>O katukytsa Sesus humo ahaspirikporêtsa iwatsahi botu ahamysopyksapybyri ty tsikykarannaha zahaokzohik.

Sesus Kiristu myzahapokzitsiki mysapyzeky nihyrikosokda iwatahi Deus ahamysopyksapybyri ty tsikykarannaha zahaokzohik.

Ana hi ahabo piwatahaka.

<sup>13</sup> O sizotsa ahabo piwatahaka.

Abaka atahi Deus nanabyitaba suknihibyize koikny baktatu ata humo hi tsinynaha,

Sesus Kiristu kino niwatihi tsinynaha.

O siypykyhydytyktsa ahabo kino niwatihi piwatahaka.

Hyrikoso sapybara pehatsa harere bo batu hÿ tsimaha.

Abaka ikiahatsa Deus tuktsa tsmoziknaha. Kahyrytsa watsa ahabo piwatahaka,

Deus myzo humo botu ahahyrinymyrëtsa.

<sup>14</sup> Sizotsa ahabo piwatahaka atahi Deus nanabyitaba suknihibyize koikny baktatu

ata humo kino ahahyrinymyrëtsa.

Atakta Sesus Kiristu ata kino niwatihi tsahahyrinymyrëtsa.

Siypykyhydytyktsa ahabo piwatahaka ahapunihikrëtsa humo.

Deus harere ahatuk, iharere bo zuba mytsaty tsimykaranaha.

Hyrikoso sapybara pehakatsa harere bo batu hÿ tsimaha.

<sup>15</sup> Ikiahatsa Deus sukyrytsitsa batu ahakparawy! Kytsa asahi Deus humo batu siakparawy tsizubarëna mozihikiknaha. Ikiahatsa ja!

Ikiahatsa siwatsa tsizubarëna tsimyzihikiknaha zeka Deus myzo batu

ahatuk ziknapykyryk. <sup>16</sup> Kytsa asahi Deus harere bo batu hÿ mykaranaha tsizubarëna mozihikiknaha. Tahanamy bo zuba mytsaty mykaranaha.

Amy bo iktsa maha zeka ana kino mozihikiknaha. Asa hi:

— O katsa zuba mynamy tsizubarëna. Iwatsahi myhyrizikwanitsa tsmoziknaha — mykaranaha. Kytsa sibo iktsa maha mozihikiknaha. Ikiahatsa siwatsa ahasopyk zeka Deus humo batu ahaspirikpo.

<sup>17</sup> Aibani sinamy mohokdaba. Kytsa sinamy zuba mozihikiknaha bykyze sinamybyitsa moziknaha. Deus harere bo hyÿ tynakaranahaktsa iwaze Deus tuk tahawahi mynapykyryknaha hÿ.

### Sesus Kiristu sukyrytsitsa.

<sup>18</sup> O katukytsa tsizubarëna mopykbaze Satanas mozumu. Atakta Sesus batu iakparawy, isoho botu tsiwabynaha. Atahi sisukyrytsa. Sizubarëtsa Sesus Kiristu sukyrytsitsa botu zumunaha, iwatsahi nanabyitaba mopykbaze ana humo hi myhyrinymyrëtsa. <sup>19</sup> Asahi Kiristu humo batu siakparawy mysapy ekze zipokonaha. Sesus tuktsa iwatsahi mytukytsa watsa nikaranaha. Nitsasonahaze:

— Katsaktsa ahaututsa pauktsitsa tsimykaranaha — mybarapetu nikaranaha. Mytutsa pauktsitsa babatsa zeka ba zikponaha. Ziponahaze myututsa pauktsitsa byitsa tu iwa ziwatawynaha.

<sup>20</sup> Ikiahatsa hi nawa ha ty wasani ahahyrinymyrëtsa. Deus hyrikoso ahatuk mynapykyryk iwatsahi nawa ha ty wasani

ahahumo tsahahyrinymyrētsa. <sup>21</sup>Iwatahi aha bo piwatahaka. Asahi sispihikbatakatsitsa batu wasape zikaha, sihyrinymyrybyitsa bo batu tywataha. Ikiahatsa hi ahahyrinymyrētsa iwatahi ahabo piwatahaka.

<sup>22</sup>Kytsa simyspihikbatanikitsitsa tihi:

— O Deus Sesus ty batu typeha. Sesus Deus tse byitatu. Deus Sesus zo byitatu — mykaranaha. Iwaze nitsasokonaha asahi Sesus Kiristu humo batu siakparawy. <sup>23</sup>Aty:

— O Sesus Deus tse ana humo hi batu spirikpo mykara — iwa my zeka atakta batu Deus humo ispirikpo. Atahi:

— O Sesus Deus tse babata — mykara. Atahi Deus humo tispirikporēta.

<sup>24</sup>Deus wasania ty botu tsiwabynaha. Deus humo tsikspirikponahaze iharere bo hỹ tsimykarana. Iharere bo hỹ tynakaranahaktsa! Iharere bo hỹ tsimykarana zeka hawa Deus mozihikik yhỹ tsimykarana. Sesus tuk tsimynapykyryknaha. <sup>25</sup>Kiristu botu mype niy:

— Kahumo meky watu tsimoziknahaktsa kytsa! Iwahatu tsimyhyrikosokdanahaze Deus tuk mywahi tsimynapykyryknaha hỹ — niy.

<sup>26</sup>Asaktsa Sesus humo batu sispirikpo mybarapetu ahabo sisopyk. Iwatahi ahabo piwatahaka sihumo pykyhytuty iwatahi piwatahaka.

<sup>27</sup>Deus hyrikoso ahatuk mynapykyryk. Batu ikiahatsa zubabyitsa Kiristu Deus hyrikoso ahabo zipeha. Deus hyrikoso atahi pahahyrinymyry babata. Wasani haty pahahyrinymyry. Ahape my:

— Sesus harere bo hỹ tynakaranahaktsa! — my. Atahi batu mybarapetu isopyk. Iharere bo hỹ tsimaha zeka Sesus tuk tsimynapykyryknaha hỹ.

### Katsaktsa Deus hyrytsa.

<sup>28</sup>— O katukytsa Kiristu harere bo hỹ tahaktsa. Iwa zeka hawa ahasopyk zeka batu ahasikpyby. Sesus myziksizoze batu ahasikpyby iwaze ahapunihkrētsa tsimoziknaha hỹ. <sup>29</sup>Deus wasani mykara ana humo hi ahahyrinymyrētsa. Asaktsa wasani mykaranaha. Deus harere bo hỹ mykaranaha Deus hyrytsa moziknaha. Ana soho bo hi mytsaty tsimykarana.

**3** <sup>1</sup>Deus myzo myhumo tsimypokzitsiarēta. Iwatahi mype my:

— Asahi kahyrytsa — my. Katsaktsa Sesus tukytsa tsimaha. Ana humo hi mytsaty tahaktsa! Iwaze kytsa Deus humo batu siakparawy katsa Deus hyrytsa ana humo hi batu sihyrinymyry. Sesus Deus tse babata ana humo sihyrinymyrybyitsa iwatsahi katsa Deus hyrytsa niwatihi batu sihyrinymyry.

<sup>2</sup>O katukytsa katsaktsa botu Deus hyrytsa tsimaha. Aibani Deus tuk mywahi tsimynapykyryknaha. Iwaze hawa tsimaha. Batu mynyhy. Kiristu myziksizoze katsaktsa ihyrytywa tsimoziknaha ana humo

hi myhyrinymyrëtsa. Hawa Kiristu mykara myhyrinymyrëtsa ibo tsimyoazonahaze myhyrinymyrëtsa babatsa. <sup>3</sup>Katsaktsa Kiristu wata tsimoziknaha ana humo hi mytsatytahaktsa. Iwatsahi tahasapywykynaha iwaze Kiristu wata tsimaha. Kiristu imysapyrënikita, batu amy tohi. Katsa mysopyksapybyitsa tu tsimykaranaha zeka ihumo batu mykparawy.

<sup>4</sup>Asahi pisapybyikinaha zeka Deus harere bo batu hÿ zikaha. Asaktsa simysopyksapybyitsa mykaranaha zeka Deus harere humo batu hyÿ zikaha. <sup>5</sup>Sesus zuba tsimysapyrëta. Zumuze mybarawy ezektsa bo mysapybyitsa tsimykaranaha iwatatu nimyokzohik. Ihumo zuba mysapybyitsa tsimykaranaha ana hi tsimoewyhiknaha. Sesus zuba Deus harere bo hyÿ mynakara. <sup>6</sup>Aty Kiristu harere bo hyÿ mykara imysapybara ty pimoewyhik. Pisapywyky iwa Deus mozihikik anahumo hyÿ mykara. Imysopyksapybyiri mykara zeka Sesus humo batu ispirikpo. Sesus humo batu ihyrinymyry.

<sup>7</sup>Katukytsa pykyhytutaha! Asaktsa Sesus humo batu sispirikpo ikiahatsa pahamyiwy tsihikiknaha iwatsahi pahapihikbatakanaha. Siharere bo ka waby waby byitaha! Asaktsa wasani sisopyk Deus okzeka wasani mykaranaha. Asahi Deus okzeka Kiristu watsa wasani mykaranaha. <sup>8</sup>Kytsa simysapybyitsa ziknakaranaha asaktsa hyrikoso sapybara pehakatsa Satanas hyrytsa. Tapara Deus bijoikpe mybarawy nizuknize Satanas Deus harere bo batu hÿ niy. Deus tse babata mybarawy ezektsa bo inasikze Satanas zikwy zipykbaik iwaha bo hi Sesus inasik.

<sup>9</sup>Katsa Deus hyrytsa tuze mysopyksapybyiri humo batu mymyzihik. Deus myzo hyrikoso mytuk mynapykyrykyk iwatsahi mysapybyitsa tsimykaranaha batu zikaha. <sup>10</sup>Aty Deus tse zeka sihumo myhyrinymyrëtsa. Aty Satanas tse zeka sihumo myhyrinymyrëtsa. Asahi wasanibyitsa sisopyk Deus hyrytsa byitsa tu maha. Asahi itukytsa tuk tahakyrikinaha batu Deus hyrytsabyitsa tu maha ihumo sispirikpobyitsa. Deus hyrytsa ihumo sispirikporëtsa zeka iwatsahi taharapepokzitsikinaha.

### **Tyharape pokzitsikinahaktsa kytsa.**

<sup>11</sup>Tyharape pokzitsikinahaktsa! Sesus humo tsikspirikpokonahaze ana harere tsiwabynaha. Tynaharape pokzitsikinahaktsa kytsa.

<sup>12</sup>Kaï waka ta byita ja. Atahi hyrikoso sapybara pehakatsa Satanas tse niy. Imysopyksapybyita nikara. Atahi tatsy zibezehek. Tatsy humo takyriki iwatahi tatsy zibeze. Itsykta wasania ty ziknakara atakta batu, imysopyksapybyiri ty ziknakara. Itsy wasani ziknakara iwatahi ihumo tsizokdirëta nikara. Iwa byita ja.

<sup>13</sup>O katukytsa, Sesus humo sispirikpobyitsa ahamo takyrikinaha zeka ahapyby byihuja. <sup>14</sup>Asa watsa byijataha asahi sinini ykarawy bo Deus mysipeha. Katsaktsa meky watu tsimoziknaha. Mytukytsa humo

mymypokzitsirêtsa. Iwatsahi batu sinini ykarawy bo tsimaha. Asaktsa ustsá mysisapybyrikinaha zeka sinini ykarawy bo maha. Asawatsa byijataha!

<sup>15</sup>Usta bo tsipisapybyrikinaha zeka mybakatsa watsa. Deus okzeka atahi tatukytsa humo takyriki mybakatsa watsa. Atahi imysopyksapybyita tu nikara batu tymoewy. Atakta Deus tuk ba mynapykyryk ana humo hi ahahyrinymyrêtsa.

<sup>16</sup>Kiristu nimyhyrinymyryky tyharape pokzitsikinahaktsa. Atahi mysapyzekenihyrikosokda. Mysapyzekeniyzik. Katsa kino niwatihiktsa tsimaha! Aty usta Sesus tukta pibeze tsihikik zeka katsa ipe tsimaha:

— O isapyzekenimoziknaha ipokzi tsimhyrikosodanaha — tsimaha. Iwa Kiristu nimehaka.

<sup>17</sup>Aparakbaha Sesus tuktsa sinamybyitsa zeka mynamy ty sibo nyny tsimaha! Sibo tybiak byizeka soso byitaha:

— O katsaktsa Deus humo mypokzitsirêtsa — ba zikaha iwa zeka mybarapetu tsimykaranaha.

<sup>18</sup>Katukytsa ustsá Sesus tuktsa tsysitsumuêhînahá. Sihumo amypokzitsi zeka ahanamy ty sibo nyny tsimaha. Ahanamy tsibiaknaha. Tsysipywykynaha. Iwaze sihumo ahamypokzitsiukrêtsa tsimaha hÿ.

#### **Deus okzeka mypunihikrêtsa tsimoziknaha.**

<sup>19</sup>Myzubaha bo tsimysisapywykynaha zeka iwa Deus mozihikik hÿ tsimykaranaha. Ana soho humo hi myhyrinymyrêtsa. Iwaze Deus bo batu tyso:

— Utakta amy ty akparawy yhÿ ja. Aharere baba ty yhÿ ja — iwa batu tyso. Myzubaha humo ahamypokzitsi zeka iwatsahi Deus okzeka batu ahapyby. <sup>20</sup>Tsipimyikinaha zeka mytsatyziú tynakaranaha:

— O abaka kamsapybyita tu mykara hawa my — tsimaha. Ahapyby byihuja Deus tsihyrinymyryrêta babata mymysapywyky iwaze batu ahapyby. <sup>21</sup>Katukytsa imysapybara ty tsimykaranaha ana soho humo hi mytsaty mytsaty byijataha iwaze Deus okzeka batu mpyby. Mypunihikrêtsa tsimoziknaha. Deus bo tsimypamykysonahaze mykurêtsa tsimozikzonaha. Iwaze imysapybara humo ka mytsaty mytsaty byijataha.

<sup>22</sup>Amy ty ibo tsimyzapykykynaha ana humo hi mybo nyny mykara. Iharere bo ma tsimykaranaha. Iwaze hawa Deus mozihikik naha humo mysopyk iwatsahi amy ty tsimyzapykykynaha mybo nyny mykara. Iwatahi namywabyky. <sup>23</sup>Deus mype:

— Ikiahatsa Sesus humo ahaspirikpohuktsa! Tynaharape pokzitsikiknahaktsa! — niy. Iwa Deus mybo nitsasoko. Atsatu Sesus botu zahahyrinymyryky. <sup>24</sup>Asaktsa Deus harere bo hÿ mykaranaha ihumo mozihikiknaha sisopyk. Asa kino ihyrytsa maha. Sibo tsysipywyky sihumo tsimypokzitsiukrêta. Deus hyrikoso ihyrytsa tuk tawahi

mynapykyryk. Iwaze Deus mymysapywyky, ihyrikoso mytuk tawahi mynapykyryk.

**Deus hyrikoso wasanita mekywatuta isopykta.**

**4** <sup>1</sup>O kaharereziuwysitsa nanabyitaba kytsa mybo mybarapetu mynakaranaha. Iwatsahi siharere humo batu hỹ. Ahamytsatyhaĩrẽtsa. Atahi:

— Utakta Deus hyrikoso humo pinymyryky — my.

Ahamytsatyhaĩrẽtsa. Tapara wabyziutaha! Ikiyahatsa zuba tsimypamykysokonaha:

— O ihyrinymyrywy wasani ja Iwaha ja. Deus nitsasoko — tsimaha.

<sup>2</sup>Deus harere baba humo nitsasokoze tsinymyrykynaha. Asahi Deus harere mymyhyrinymyrynahaze mype mykaranaha:

— Deus Sesus zipehata my. Mybarawy inasikze maku niyzik — mykaranaha. Zikino Deus sohokotsa piwatawykynaha. Deus hyrikoso situk mynapykyryk. <sup>3</sup>Utsa Sesus Kiristu soho mekytu motsasokoronaha asahi batu Deus harere ty tyso. Asaktsa:

— Deus Sesus ty mybarawy bo batu ty peha. Batu maku yzik — mykaranaha. Asatu tahyrinymyrykynaha. Deus hyrikoso situk ba zikapykyk. Asa kino Sesus bo batu siakparawy, Sesus sukyrytsitsa ana humo kino mymyhyrinymyrykynaha. Botu tsiwabynaha, atakta Sesus bo batu iakparawy isukyryhyta hyrikoso mozumu. Atahi botu izumu.

<sup>4</sup>Katukytsa ikiahatsa hi Deus hyrytsa tsimaha. Atakta Sesus humo batu iakparawy, sisukyrytsitsa moziknaha atakta hyrikoso sapybara pehakatsa ata humo hi kytsa Sesus humo batu sispirikpo. Asahi Sesus sukyrytsitsa Satanas harere bo hỹ mykaranaha. Deus hyrikoso ahatur mynapykyrykta abazuba tsipunihikrẽta hỹ ba hawa tohi zikzukninaha. Iwatsahi Deus sohobyitsa harere nepyknaha. Sizikwy mohokda.

<sup>5</sup>Asahi Deus sohobyitsa kytsa Sesus humo batu sispirikpo asahi sinamy soho zuba mopamykysokonaha. Deus hyrikoso situk ba mynapykyryk iwaze kytsa Deus bo batu siakparawy siharere piwaby tsihikiknaha.

<sup>6</sup>Katsa hiba Deus hyrytsa tsimaha. Kytsa Sesus humo sispirikporẽtsa myharere piwabyziukunaha. Kytsa Deus harere bo batu hỹ mykaranaha myharere humo kino niwatihi batu siakparawy. Iwatsahi aty Deus harere baba ty mymyhyrinymyrykynaha mytsatziu tynakaranahaktsa. Asahi mymyitsa, wasanibiytsa mykaranaha asa humo kino batu hỹ tsimaha.

**Deus myhumo tsimypokzitsiarẽta iwatsahi tyharape pokzitsikinahaktsa!**

<sup>7</sup>— O kaharereziuwysitsa tyharape pokzitsikinahaktsa! Sesus tuktsa bo tysisapywykynaha zeka hawa Deus mozihikik ana bo hi yhỹ tsimykaranaha. Katsa tsimyarape pokzitsikinaha zeka Deus hyrytsa



babatsa tsimoziknaha. Sesus tukytsa tsimaha. Iwaze Deus harere bo hyỹ tsimykaranaha.

<sup>8</sup>Deus myzubaha humo tsimypokzitsiukrêta. Ata zuba sizubarêtsa humo mysipokzitsi tsihikik. Iwatahi aty ustsá humo ka imypokzitsiu byizeka Deus tukytsa byitsa tu. <sup>9</sup>Deus myhumo tsimypokzitsiukrêta ana humo hi botu myhyrinymyrêtsa. Deus tatse zipeha atahi itse babata. Mybarawy ezektsa bo tatse zipehaze myhumo tsimypokzitsiukrêta ziwatawy. Sesus mysapyzekenihyrikosokda iwaze tazo bo mymyoktyhyryk. Iwa Deus myhumo tsimypokzitsiukrêta myhyrinymyrêtsa hỹ.

<sup>10</sup>Tubabatu katsa Deus humo batu mykparawy Deus zuba myhumo tsimypokzitsiukrêta. Iwaze mybo tatse zipeha. Katsa mysopyksapybyitsa tsikykaranaha ihumo mymyokzohik. Atahi mysapyzekenihyrikosokdaze mysapybyi tsikykaranaha Deus Sesus humo mymyokzohik. Iwaze tsimyhyrikosokdanaha zeka Deus tuk mywahi tsimynapykyrykna.

<sup>11</sup>O katukytsa Deus myhumo tsimypokzitsiukrêta zeka iwatsahi tyharape pokzitsikinahaktsa tsimaha. <sup>12</sup>Batu aty tohi Deus ty ityny. Tsinaharapepokzitsikinaha zeka Deus mytuk mynapykyryk. Iharere bo hyỹ tsimykaranahaze ustsá bo tsimysisapywykynaha. Iwatsahi Deus zikwy mytuku myhyrinymyrêtsa hỹ.

<sup>13</sup>Deus hyrikoso mybo zipehahik. Ihyrikoso hi mytuk mynapykyryk. Iwatsahi hawa Deus mozihihik ihyrikoso humo yhỹ tsimykaranaha. Ihyrikoso mytukze iharere bo hyỹ tsimykaranaha. Ihyrikoso kino myhumo tsimypokzitsiukrêta. <sup>14</sup>Deus tatse babata zipeha. Mybarawy ezektsa bo zipeha iwatahi inasikze myzubarêtsa Deus bo mymyokty tsihikik. Hawa Sesus nikara ana bo hi iktsa tsikaha. Iwatsahi Sesus Deus bo mymyoktyhyrykta ana hi myzubaha bo tsimytsasokonaha. <sup>15</sup>Aty my zeka:

“O Sesus Deus tse babata tihi my” — niy. Isikpybybyita tu Sesus Deus tse motsasoko iwaze Deus ituk mynapykyryk. Atahi hawa Deus mozihihik yhỹ mynakara. <sup>16</sup>Deus tatse zipeha atahi katsa tazo bo mymyoktyhyryk. Iwatsahi myhumo tsimypokzitsiukrêta myhyrinymyrêtsa. Iwatsahi katsa tihi:

— O Deus myhumo tsamypokzitsiukrêta — tsimaha. Iwaze sizubarêtsa bo tsimytsasokonaha:

— O Deus myzubaha humo tsimypokzitsiukrêta — tsimaha. Kytsa humo tsipisapywykynaha zeka hawa Deus mozihihik ana ty hi yhỹ tsimaha. Deus kino myhumo tsimypokzitsiukrêta. <sup>17</sup>Sizubarêtsa bo tsimysisapywykynaha zeka mypunihikrêtsa tsimoziknaha. Deus simysapybyitsa tu nikaranahatsa boze tihi:

— Kaokzeka ikiahatsa ahamysapybyitsa tsikykaranaha. Katse ahasapyzekenihyrikosokda iwatahi ihumo pahaokzohik — my.

Iwatsahi motsasokoze katsaktsa batu mysikpyby. Katsaktsa iokzeka mypunihikrêtsa tsimaha. Kytsa bo tsimysisapywykynahaze mypunihikrêtsa tsimoziknaha. Katsa Kiristu watsa mysopyk zeka iwatsahi ihumo batu mysikpyby.

<sup>18</sup>Deus myhumo tsimypokzitsiukrêta ana humo hi tsimyspirikponaha zeka batu mypyby. Mypybybyitsa tu zeka kytsa tsimysisapywykynaha iwatsahi mypunihikrêtsa tsimaha. Mypybyrêtsa zeka katsaktsa:

— Deus myhumo tsimypokzitsiukrêta ja. Mysapybyitsa tu tsimykaranaha mymyokzo ja — tsimaha. Iwa tamyiba zeka mypybyrêtsa tsimoziknaha. Mypybyrêtsa tu zeka ustsá humo ba ziksipokzitsi.

<sup>19</sup>Taparaka Deus myhumo tsimypokzitsiukrêta. Abaka katsaktsa Deus humo mympokzitsirêtsa. Ihumo ustsá bo tahapokzitsikinaha hỹ. <sup>20</sup>Katsaktsa ustsá Sesus tuktsa humo tahakyrikinaha zeka Deus harere bo batu hỹ tsimykaranaha. Kytsa humo ahamypokzitsi byizeka ba ziktsasonaha:

— O Deus ahumo mympokzitsirêtsa — mybarapetu tsimykaranaha. Batu aty tohi Deus ty tyny. Kytsa bo iktsa ziknakaranaha. Mytuktsa bo iktsa tsimykaranaha, sihumo tsimypokzitsibyinaha zeka Deus humo kino niwatihi ba zikmypoKzitsi. Deus humo mympokzitsibyitsa babatsa ata kino batu iktsa ziky. Iwatsahi batu ihumo mympokzitsi mytsaty ahabyitsa tsimykaranaha. <sup>21</sup>Kiristu botu nimyhyrinymyryky:

— Ikiahatsa Deus humo ahapokzitsirêtsa zeka tyharape pokzitsikinahaktsa! — niy. Iwa Kiristu nimyhyrinymyryky.

#### Sesus tuktsa sispirikpobyitsa harere humo nepyknaha.

**5** <sup>1</sup>Kyze asaktsa Deus Sesus zipehata humo mospirikpokonaha asahi Deus hyrytsa maha. Sesus Deus tse ana hi motsasokonahaze Sesus tukytsa moziknaha. <sup>2</sup>Myzo tapokzitsi zeka ihyrytsa kino niwatihi tahapokzitsikinaha. Deus humo tsimypokzitsikinaha zeka iharere bo zuba hyỹ tsimykaranaha. Iwa tyharape pokzitsikinaha hỹ tsimykaranaha. <sup>3</sup>Deus humo tsimypokzitsikinahaze iharere bo hyỹ tsimykaranaha. Iwa ihumo tsimypokzitsirêtsa hỹ. Batu iharere ihokdaha iwatsahi iharere bo hyỹ tsimykaranaha.

<sup>4</sup>Asaktsa Sesus humo batu sispirikpo Deus hyrytsa humo sizikwy nepykba. Katsaktsa Sesus humo myspirikporêtsa botu sizikwy myhumo nepyk. Sesus zikwy mytuk mynapykyryk iwatsahi batu sipunihik. <sup>5</sup>Kytsa Sesus Deus tse humo sispirikporêtsa asa zuba sispirikpobyitsa zikwy nepykbaik iwa hỹ.

#### Asahi Sesus Kiristu Deus tse babata piwatawyna.

<sup>6</sup>Deus Sesus zipeha. Mybarawy ezektsa bo inasikze Deus harere bo hyỹ ziknakara. Iwaze Suão Sesus pihik ty ziharasusuze. Aiba eze zuba

iharapatawyhyta humo tabezewy mysapyzky nihyrikosokda iwahatu katsa Deus tuk mywahi tsimynapykyryknaha. Nihyrikosokdaze Deus zipehata nikara. Abaka Deus zipehata mynakara. Tawahi Deus zipehata mynakara. <sup>7-8</sup>Sesus nimyhyrinymyryky:

— Utakta Deus tse — nikara. Mytsaty tsimykarannahaze hawa niy ta ziharasusuhik. Mytsaty tsimykarannahaze hawa mysapyzky nihyrikosokda atahi Deus tse babata humo myhyrinymyrëtsa. Deus hyrikoso kino niwatihi mymyhyrinymyryky:

— Sesus Deus tse — my. Atahi wasania ty zuba mynatsasoko. Iwatsahi harakykbyi myspirikpowy Sesus Deus tse babata mykarannahaze iwatsahi myhyrinymyrëtsa. <sup>9</sup>Maku harere humo tsikspirikponaha. Deus imysapyrënikita iwaze iharere humo tsikspirikpobanaha hÿ. Abaka aty mybo nitsasoko Sesus Deus tse ata kino Deus tihi my. Iwatahi iharere wasani hÿ. <sup>10</sup>Deus hi tatse soho nitsasoko. Asahi Sesus humo sispirikporëtsa:

— O Deus tse Sesus humo kaspirikporëta wasani myhÿ — maha. Sispirikpobyitsa:

— Amy ty Deus tatse soho nitsasoko batu kaspirikpo, iharere bo batu hÿ — maha. Iwa motsasokonahaze Deus imyspiphikbatanikita wata mykarannahaze. Simysapybyitsa tu iharere humo batu sispirikpo iwatsahi Deus imyspiphikbatanikita motsasokonaha. <sup>11</sup>Deus harere bo wabyziutaha! Deus:

— Katse ahasapyzky nihyrikosokda anahumo hi mekywa tu tsimyzurukunaha! Sesus tuk tsimyzurukunahaktsa! Tsimyhyrikosokdanahaze katuk ahawahi tsimynapykyryknaha — niy.

<sup>12</sup>Asahi Deus tse humo sispirikporëtsa meky watu moziknaha. Sesus tuk mozurukunaha. Myhyrikosokdanahaze Deus tuk tahawahi mynapykyryknaha. Sispirikpobyitsa batu. Sesus zikwy situk ba zikapykyryk mohyrikosokdanahaze batu Deus tuk zikapykyryknaha. Nokponi mynapykyryknaha sinini ykarawy bo tahasapynaha.

### **Asaktsa mohyrikosokdanahaze tahawahi Deus tuk mynapykyryknaha.**

<sup>13</sup>Ahabo ziwatahaka. Ikiahatsa Deus tse humo ahaspirikporëtsa iwaze meky watu tsmoziknaha. Sesus tuk tsimyzurukunaha. Tsimyhyrikosokdanahaze ahawahi Deus tuk tsimynapykyryknaha hÿ. Iwatahi ahabo piwatahaka. <sup>14</sup>Kyze katsaktsa Deus bo tsimypamykysokonaha. Deus bo tsimyzapykykynaha zeka hawa Deus mozihikik iwaze myharere piwaby. Iwatsahi mypunihikrëtsa tsmoziknaha nawa ibo tsimyzapykykynaha. <sup>15</sup>Myhyrinymyrëtsa tu myharere piwaby zeka amy ty tasapyky zeka Deus mybo nyny my. Amy ty mozihikik naha zuba ibo tasapyky zeka iwaze mybo nyny myhÿ.

<sup>16-17</sup>Aty mytukytsa tuk isopyksapybyi mykara zeka ikiahatsa itsyhyryze Deus bo tsimypamykysokonaha. Deus sisopyksapybyi mysiokzohik iwaze

Deus tuk tawahi mynapykyryk. Myzubarētsa tamyikik. Atakta Deus okzeka batu imysapy ihyrikoso pimijjanaha zeka atahi ba iokzohok iwaze itsyhyryze Deus bo ba zikpamykyso. Atakta sinini ykarawy bo Deus pipeha. Nokponi Deus bara botu sinini ykarawy bo tasapy.

<sup>18</sup>Deus hyrytsa imysapybara humo ba h̄yzo zikaha. Deus tse sihumo tsimypokzitsiukrēta tu iwatsahi sisopyksapybyitsa tu batu h̄y mykaranaha. Satanas sihumo batu ziky Deus tse sihumo tsimypokzitsiukrēta h̄y.

<sup>19</sup>Katsakta Deus hyrytsa tsimaha. Deus zikwy mytuk mynapykyryk iwatsahi myhyrinymyrētsa. Utsa mybarawy ezektsa pykyhytu zikahabyikitsa Satanas zikwy situk mynapykyryk iwatsahi sispirikpobyitsa mynakaranaha.

<sup>20</sup>Deus tse inasik. Botu mybarawy bo izumu ana humo hi myhyrinymyrētsa. Deus soho humo nimyhyrinymyryky. Hawa Deus mykaraze nimyhyrinymyry iwaze Deus babata humo nimyhyrinymyryky. Ata zuba wasani mykara. Ata zuba isopyksapyrēnikita. Ata soho humo hi tsipinymyrykynaha. Sesus humo myspirikporētsa. Sesus Deus tse humo tsimyspirikpokonaha zeka Deus humo myhyrinymyrētsa. Iharere bo zuba h̄y tsimykaranaha iwaze meky watu tsimoziknaha. Ata zuba Deus babata. Aty iharere bo h̄y mykara mekywa tu mozik. Mohyrikosokdaze Deus tuk tawahi mynapykyryk h̄y.

<sup>21</sup>Kahyrytsa pykyhytutaha! Deusbyitsa harere bo ka yh̄y byitaha kytsa Deus soho pimiyinaha zeka iwatsahi pykyhytutaha!

Suão